

傳夫小國寡民勢不足以自存者使有道
蒞之猶能使民雖有什伯之器終不用之
於戎事故民樂其生而重其死安乎土而
不轉徙不遠交以求援故雖有舟輿无所
乘不近攻以取利故雖有甲兵无所陳上
下相安幽明不欺使民復結繩之約用之

而不違嗜欲甚寡故甘其糲食美其儉服
征稅甚薄故安其常居興其淳俗與國比
鄰相望於遠近雞鳴犬吠相聞於都鄙如
此其密邇也然而无欲无求各得其所
以至老死而不相往來者治之極也老氏
所以陳道德之教其志於此乎

經信言不美美言不信善者不辯辯者不善
知者不博博者不知聖人无積既以與人已
愈有既以與人已愈多天之道利而不害聖
人之道為而不爭

傳信實之言不必美者以其質也美好之
言不必信者以其華也善於心者不必辯
本乎樸也辯於口者不必善貴乎言也知
其要者不必博少則得也博於事者不必

知多則惑也聖人唯善是與而无私利故
无所積蓄以善為人而已得善斯愈有
也蓋以利與人而已得利斯愈多也天之
道春夏生之畜之秋冬成之熟之是利而
不害聖人之道順物之理而不與物爭蓋
法天而然也

道德真經傳卷之四

正一天師清微弟子 洪百堅 製作

道教學術資訊網站

道德真經傳表

必五

臣惠卿言臣聞庖丁奏刀得養生於文惠輪
扁釋鑿讀書於齊桓志之不分道或有在
臣誠惶誠懼頓首頓首臣竊以大制散於智
慧之偽含生失其性情之初爰有真人起明
至教獨推原於道德蓋祖述於典墳是以雞
犬相聞莊周指謂神農而上谷神不死列子
稱為黃帝之書究其微言中有妙物唯恍唯
惚視聽莫得以見聞不古不今迎隨孰知其
首尾失之其出彌遠至寶秘於荆山而莫知
悟之不召自來玄珠索之象罔而可得軒轅
華胥之國唐堯姑射之山皆極至遊邊臻泰
定此書之指其詣不殊曹叅師於蓋公而相
齊國孝文傳之河上而為漢宗僅得淺膚猶
幾康阜夫唯俗學不識道真徒見其文有異
詩書之迹莫知其指乃是皇王之宗故聞不
尚賢則謂遺之野而不收不貴貨則謂棄諸
地而不用謂絕學則无憂等於禽犢謂絕聖
則无法同於鴻荒不知靈府之間有若清眸
之上雖留金屑亦翳神光故今善惡之兩遺

而極沖虛之一致茲難情度宜使智迷遂以
 先聖之信言列於百家之珍說發茲微學宜
 屬至神伏惟皇帝陛下以高真之質而出應
 君師以妙本之餘而形為事業蠶飭而庶政
 交舉華嘗而四方已孚方將齊心服形而指
 治物養己之累深根固蒂以趣長生久視之
 門同天下於華胥見神人於姑射深造其極
 適丁斯時臣性維顛蒙生足憂慮每思朝徹
 以解天殺汎觀以考其散殊又損而期於胞
 合維日不足歷年於茲晚於斯文忽若有得
 即動而靜物芸芸而歸根由濁以清中冥冥
 而見曉遂以其意達之於辭雖云自安未知
 其可竊謂至人之靜鑑實為學者之元龜故
 用冒聞以占中否龍隨章散固難知其上天
 馬以智專因可取於辯道儻有一言之補敢
 辭萬死之誅五所著老子道德經傳凡四冊謹
 奉表投進以聞五臣惠卿誠惶誠懼頓首頓首
 謹言

元豐元年正月日資政殿學士通議大
 夫定州路安撫使馬步軍都總

管兼知定州軍州事及管内勸
 農使上輕車都尉東平縣開國
 伯食邑八百戶臣呂惠卿上表

正一天師清微弟子 洪百堅 製作
 道教學術資訊網站

道德真經傳卷之一

資政殿學士呂惠卿傳

道可道章第一

道可道非常道名可名非常名无名天地之
 始有名萬物之母常无欲以觀其妙常有欲
 以觀其微此兩者同出而異名同謂之玄玄
 之又玄衆妙之門

傳曰凡天下之道其可道者莫非道也而
 有時乎而殆則非常道也凡天下之名其
 可名者莫非名也而有時乎而去則非常
 名也萬物芸芸各復歸其根而不知曰靜
 靜曰復命復命曰常為道而至乎常則心
 凝形釋物我皆忘夫孰知道之可道而名
 之可名哉則常道者固不可道也故曰道
 乃久歿身不殆常名者固不可名也故曰
 自古及今其名不去不殆不去是之謂常
 道常无名則无名者道也而天地之所自
 而始也故曰无名天地之始太初有无无
 有无名有无无則一亦不可得有无名則
 一之所起有一而未形也既謂之一則